

LIGJ
Nr.7566, datë 25.5.1992

PËR ARMËT

Në mbështetje të nenit 16 të ligjit nr.7491, datë 29.4.1991 "Për dispozitat kryesore kushtetuese", me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I :

Neni 1

Quhen armë në kuptimin e këtij ligji armët e zjarrit të çdo lloji e kalibri (armët luftarake, sportive, gjuetie e speciale dhe të prodhuara e të përshtatura në mënyre artizanale), municionet e tyre, bombat e minat, si dhe armët e ftohta, si shpatat, bajonetat, thikat dhe mjetet e tjera të përgatitura e të destinuara posaçërisht për sulm kundër personave ose për vetëmbrojtje.

Neni 2

Armët luftarake të zjarrit, sportive dhe të ftohta janë vetëm pronë shtetërore.
Armët e gjuetisë mund të jenë pronë e shtetit ose e personave juridikë e fizikë.

Neni 3

Prodhimi dhe ndreqja e armëve të zjarrit bëhet në uzina e ndërmarrje të specializuara që kontrollohen nga shteti. Ndreqja e armëve mund të bëhet në punishte private të pajisura me leje të posaçme nga organet e Rendit Publik.

Neni 4

Të drejtën për dhënien e armëve luftarake të zjarrit për efektivat e kanë përkatësisht Ministria e Mbrojtjes, Ministria e Rendit Publik dhe Shërbimi Informativ Kombëtar.

Neni 5

Kanë të drejtë të pajisen me armë zjarri nga organet e Rendit Publik personat me detyrë shtetërore e partiake :

a) Deputetët e Kuvendit Popullor, anëtarët e Këshillit të Ministrave dhe personat e tjerë të barazuar me ta, kryetarët e partive politike, kryetari i Gjykatës Kushtetuese, kryetari i Gjykatës së Kasacionit, prokurori i Përgjithshëm e kryetari i Hetuesisë së Përgjithshme dhe zëvendësit e tyre, si dhe drejtuesit e organeve lokale të pushtetit në njësitë bazë administrative tokësore.

b) Gjyqtarët, përmbauesit gjyqësorë, prokurorët dhe hetuesit në organet qendrore e në rrethe, sipas kërkesës së tyre.

c) Shoferët e personave që përfshihen në shkronjën "a".

Neni 6

Kur personat e përcaktuar në nenin 5 të këtij ligji largohen nga detyra ose funksioni, u hiqet e drejta për mbajtjen e armës dhe detyrohen ta dorëzojnë atë në organin përkatës të Rendit Publik, sipas rregullave të caktuara nga Ministria e Rendit Publik.

Neni 7

Organet e Rendit Publik japin leje dhe pajisin me armë zjarri :

- a) Personat fizikë që caktohen me detyrën e rojes për sigurimin e objekteve të përcaktuara me akt nënligjor të Këshillit të Ministrave.
- b) Kryetarët e trenave të mallrave e të udhëtarëve.
- c) Kinostudion "Albafilm", Radiotelevizionin Shqiptar, trupat teatrale kombëtare e në rrethe, muzetë kombëtare dhe ato të rretheve e zonave.

Neni 8

Armët e zjarrit që përfshihen në nenin 7, shkronja "c" dhe municionet e tyre duhet të jenë të paefektshme, me përjashtim të rasteve që përcaktohen me rregullore të veçantë nga Ministria e Rendit Publik.

Armët e zjarrit që përfshihen në nenin 7, shkronja "a", të jenë armë krahu të gjata.

Personat që përfshihen në nenin 7, shkronja "a", gjatë kohës që mbajnë armë, duhet të kenë një shenjë dalluese të dukshme, të caktuar nga Ministria e Rendit Publik.

Neni 9

Personat fizikë që paisen me armë sipas nenit 7 të këtij ligji, duhet të kenë mbushur moshën 22 vjeç, të mos kenë të meta mendore e fizike dhe të mos kenë qenë të dënuar më parë për vepra penale që përbëjnë krime.

Neni 10

Personi që mban me leje armë të çdo lloji, ka përgjegjësi ligjore për përdorimin e saj nga të tjerët.

Ndalohet përdorimi i armëve të zjarrit të luftës për gjueti. Qitja me armë zjarri të luftës dhe ato sportive lejohet vetëm në poligonet, ose në vendet e caktuara për këtë qëllim, me masa sigurimi.

Neni 11

Ndalohet veprimtaria e paligjshme e dhurimit, këmbimit dhe trafikut të armëve të zjarrit dhe të municioneve të tyre.

Lejohet të sillen armë gjahu nga jashtë, kur personi fizik a juridik është i pajisur me leje përkatëse nga organet e Rendit Publik.

Neni 12

Organet e Rendit Publik kanë të drejtë t'i heqin personit armën e zjarrit të çdo lloji, kur ai shkel rregullat për mbajtjen e përdorimin e tyre ose kur paraqet rrezik se mund t'i përdorë si mjet krimi.

Kur hiqet leja për mbajtjen e armës, këto u dorëzohen: Armët luftarake të zjarrit dhe armët e ftohta organeve të Rendit Publik, armët sportive shtetërore seksioneve të kulturës dhe sporteve të organeve lokale të pushtetit, armët e gjahut u dorëzohen përkatësisht seksioneve të kulturës dhe sporteve dhe shoqatës së gjuetarëve, të cilët, në marrëveshje me pronarin, i shesin për llogari të tij ose asgjësohen, kur ato janë të papërdorshme.

Neni 13

Shkelja e rregullave të përcaktuara në nenet 2, 3, 6, 8, 10, 11 e 12 të këtij ligji, kur nuk formon vepër penale, dënohet për kundërvajtje administrative me gjobë nga 2000 deri në 5000 lekë dhe deri në marrjen e armës, nga shefi i policisë së njësisë administrativo-tokësore.

Kundër vendimit të dënimit mund të bëhet ankim, brenda 5 ditëve nga shpallja e vendimit ose

e njoftimit të tij, te kryetari i degës së Rendit Publik, akti i të cilit është i formës së prerë.

Neni 14

Nuk ka të drejtë të mbajë armë asnjë person tjetër, përveç atyre të përcaktuar me këtë ligj.

Personat fizikë që e humbasin të drejtën e mbajtjes së armës janë të detyruar t'i dorëzojnë ato pranë organeve të Rendit Publik.

Personat fizikë që kanë armë pa leje dhe që i dorëzojnë ato vullnetarisht brenda 15 ditëve nga hyrja në fuqi e këtij ligji, përjashtohen nga përgjegjësia penale.

Lejohen forcat e rendit të bëjnë kontroll për armëmbajtje pa leje. Autorët e veprës penale të armëmbajtjes pa leje të hetohen e të gjykohen në gjendje arresti.

Mbajtja pa leje e armëve të zjarrit të luftës dënohet nga 5 deri në 15 vjet heqje lirie.

Neni 15

Armët me vlera historike e kulturore, që ruhen në muze, në familje dhe nga persona privatë, vlerësohen si të tilla nga një komision i posaçëm, dokumentohen në një regjistër të veçantë dhe i lihen në zotërim personit pa të drejtën e municioneve për to. Shitja e tyre lejohet vetëm duke ua kaluar muzeve shqiptare ose organeve shtetërore përkatëse.

Neni 16

Rregullat e administrimit dhe të kontrollit të armëve për personat fizikë e juridikë caktohen nga Këshilli i Ministrave.

Neni 17

Dekreti nr.4279, dt.20.6.1967 "Për armët" si dhe aktet ligjore e nënligjore që bien në kundërshtim me këtë ligj shfuqizohen.

Neni 18

Ky ligj hyn në fuqi menjëherë.

Shpallur me dekretin nr.195, datë 29.5.1992 të Presidentit të Republikës së Shqipërisë, Sali Berisha